

經

義

考

經義考卷二百五十六

秀水 朱彝尊 編

男 昆田 校

四書 五

朱氏 升 四書旁注

十九卷

存

蔣氏 允汶 四書纂類

未見

黃虞稷曰字彬夫永嘉人元進士洪武初官本府訓導

陶氏 宗儀 四書補遺

佚

王氏逢

四書通義

未見

黃虞稷曰逢字原夫江西樂平人師事洪野谷野谷朱公遷弟子也宣德初逢以薦爲富陽縣儒學訓導又以明經辟召皆不就學者稱松塢先生

何氏

英

四書釋要

未見

黃虞稷曰英爲王逢弟子

景氏

星

四書集說啟蒙

闕

論語孟子未見

星自序曰星幼承父命嗣儒業而苦無常師年十六始得出就伯父黃先生學先生曰汝欲爲學必先熟讀四書以

爲之本而後他經可讀矣星於是晝誦夜思不敢少惰居
四年得初通大義後欲明經習舉子業先生又引星進郡
庠俾受春秋經於勾乘楊先生一時師友切慫問辨資益
爲多復得諸引翼書爲之啟發然後益知四書奧義不可
不窮矣故星不揆庸愚僭於佔畢之暇彙集諸說熟玩詳
味分經別注妄加去取十年之內掇拾成編目之曰四書
集說啟蒙將私塾以訓子孫既而一二同志懼其久而墜
佚使壽諸梓以便初學顧星僭妄之罪已不可追尙賴諸
明理君子重加訂正而可否之則星之志也至正壬寅
姓譜景星字德輝餘姚人洪武中官杭州儒學訓導其學
長於春秋今惟四書啟蒙行於世

鄭氏

濟

四書講解

未見

黃虞稷曰濟閩縣人洪武中儋州學正

趙氏新四書說約

佚

黃虞稷曰新字彥明樂清人洪武中歷官布政使改翰林

院修撰致仕

葉氏儀四書直說

未見

張氏宣四書點本

未見

王氏廉四書詳說

口卷

存

劉昌曰四書詳說蘇州知府況公鍾刻於府庠袁鉉作序以爲王廉熙陽作言熙陽丞澠池時稿留曹端家刻旣成其書四出端爲霍州學正移文於蘇言四書詳說乃其所著孟子中有其訂定白馬之白一段又言熙陽以坐刑不當有著書之名熙陽爲山西左布政使以公事死無害其爲著書也端辨四書詳說爲其所著可也言熙陽坐刑不當有著書之名非也

陸元輔曰文王演易於羨里史遷作史於腐刑郝經傳春秋於拘繫所洪武中葉子奇亦於獄中撰草木子著書與坐刑初不相妨也月川遺書行世頗有當還熙陽之名

冉氏庸
四書精華

佚

張氏洪四書解義

二十卷

未見

黃氏鼎四書精義

未見

劉氏醇四書解疑

四卷

未見

朱氏謚四書述義

未見

胡氏廣等四書大全

三十六卷

存

明成祖文皇帝御製序曰朕惟昔者聖王繼天立極以道治天下自伏羲神農黃帝堯舜禹湯文武相傳授受上以是命之下以是承之率能致雍熙悠久之盛者不越乎道以爲治也下及秦漢以來或治或否或久或近率不能如古昔之盛者或忽之而不行或行之而不純所以天下卒無善治人不得以蒙至治之澤可勝歎哉夫道之在天下無古今之殊人之稟受於天者亦無古今之異何後世治亂得失與古昔相距之遼絕歟此無他道之不明不行故也道之不明不行夫豈道之病哉其爲世道之責孰得而辭焉夫知世道之責在己則必能任斯道之重而不敢忽

如此則道豈有不明不行而世豈有不治也哉朕纘承皇
考太祖高皇帝鴻基卽位以來孳孳圖治恆慮任君師治
教之重惟恐弗逮竊思帝王之治一本於道所謂道者人
倫日用之理初非有待於外也厥初聖人未生道在天地
聖人旣生道在聖人聖人已往道在六經六經者聖人爲
治之迹也六經之道明則天地聖人之心可見而至治之
功可成六經之道不明則人之心術不正而邪說暴行侵
尋蠹害欲求善治烏可得乎朕爲此懼乃者命儒臣編修
五經四書集諸家傳注而爲大全凡有發明經義者取之
悖於經旨者去之又輯先儒成書及其論議格言輔翼五
經四書有裨於斯道者類編爲帙名曰性理大全書編成
來進總二百二十九卷朕閒閱之廣大悉備如江河之有

源委山川之有條理於是聖賢之道粲然而復明所謂考
諸三王而不謬建諸天地而不悖質諸鬼神而無疑百世
以俟聖人而不惑大哉聖人之道乎豈得而私之遂命工
悉以鈔梓頒布天下使天下之人獲覩經書之全探見聖
賢之蘊由是窮理以明道立誠以達本修之於身行之於
家用之於國而達之天下使國不異政家不殊俗大同滄
古之風以紹先王之統以成熙皞之治將必有賴於斯焉
遂書以爲序永樂十三年十月初一日

楊榮後序曰太宗文皇帝臨御之日宵旰孜孜誕興文教
以斯道爲己任萬幾之暇嘗與儒臣論議以爲四書雖有
宋儒朱熹爲之集注以便學者然而羣儒之說頗有異同
純駁不一至今幾三百餘年紛紜雜糅莫知適從茲欲會

而通之去其駁而錄其純庶幾聖賢之道昭然大明臣榮
忝居侍從恭奉德音敢不敬承謹識四方學者曩以成編
上親商榷以定去取書成特賜名曰四書大全書卽以頒
布天下學校凡從事於聖賢之學者莫不欣焉若披雲霧
而仰青天若剪荆棘而尋大路坦然無疑釋然有悟誠萬
世之寶也予鄉建陽葉添德氏家素崇文而好學博雅閒
於庠序得觀此書遂求抄錄鈐諸梓以廣其傳乃以書來
京師請予言識之夫奉揚上之盛德美意以昭示於無窮
者人臣之事也昔太宗文皇帝惓惓纂輯是書以嘉惠天
下後世有功於聖門大矣然而添德以民間之僉者乃能
廣播而盛傳之此其所以超於眾人者豈不遠哉是可嘉
也因拜手以識於後

顧炎武曰自朱子作大學中庸章句或問論語孟子集注

之後黃氏

幹字直卿號
勉齋先生

有論語通釋而采語錄附於朱子

章句之下則始於眞氏

德秀字希元
號西山先生

名曰集義止大學一

書祝氏

沫字
宗道

乃倣而足之爲四書附錄後有蔡氏

模字仲
覺號覺

軒先生

四書集疏趙氏

順孫號格
庵先生

四書纂疏吳氏

質子號克
齋先生

四書集成昔之論者病其泛濫於是陳氏

櫟字壽翁號
定字先生

作

四書發明胡氏

炳文字仲虎
號雲峯先生

作四書通而定字之門人倪

氏

士數字仲
號道川先生

合二書爲一頗有刪正名曰四書輯釋有

汪克寬序至正丙戌自永樂中命儒臣纂修四書大全頒

之學官而諸書皆廢倪氏輯釋今見於劉用章

刻

所刻四

書通義中永樂中所纂四書大全特小有增刪其詳其簡

或多不如倪氏大學中庸或問則全不異而間有舛誤至

春秋大全則全襲元人汪克寬胡傳纂疏但改其中愚按
二字爲汪氏曰及添廬陵李氏等一二條而已詩經大全
則全襲元人劉瑾詩傳通釋而改其中愚按二字爲安成
劉氏曰其三經後人皆不見舊書亦未必不因前人也當
日儒臣奉旨修四書五經大全頒發錢給筆札書成之日
賜金遷秩所費於國家者不知凡幾將謂此書旣成可以
章一代教學之功啟百世儒林之緒而僅取已成之書抄
謄一過上欺朝廷下誑士子唐宋之時有是事乎豈非骨
鯁之臣已空於建文之代而制義初行一時人士盡棄宋
元以來所傳之實學上下相蒙以饗祿利而莫之問也嗚
呼經學之廢實自此始後之君子欲掃而更之亦難乎其
爲力矣

張氏 文選 四書訓解

佚

王瓚曰張文選字士銓永嘉人永樂丙戌進士改庶吉士

郭氏 恕 四書一得

佚

陸元輔曰永樂甲午舉人

楊氏 範 四書直說

未見

寧波府志楊範字九疇鄞人永樂中教授里中自號思誠

叟侍郎守陳之祖也

張氏 楷 四書糠秕

佚

寧波府志張楷字式之慈谿人永樂甲辰進士南京都察

院僉都御史

楊氏

琦

四書辨疑

未見

黃虞稷曰琦建安人正統中温州府學訓導

周氏

灝

四書精解

四卷

未見

黃虞稷曰灝邵武人景泰中舉人松江府同知

李氏

果

四書音考

未見

廣平府志李果字尙用成安人景泰庚午舉人濟南知府

楊氏 守陳 四書私抄

口卷

存

沈氏 肆 四書口義

未見

平湖縣志沈肆字公貴景泰辛未進士任御史

周氏 賓 四書音考

未見

黃虞稷曰賓字汝欽江西安福人天順甲申進士

董氏 彝 四書經疑問對

八卷

未見

繆泳曰常熟人成化壬辰進士

蔡氏清四書蒙引

十五卷

存

清自序曰國家以經術造士其法正矣第士之所以求於經者淺也蓋不務深於理而徒務辨於文文雖工術不正而行與業隨之矣舉子業之關世道也有如此清之始業是也自謂頗知所用心者故有三年不作課而無三日不看書閒以其所窺見者語諸同儕要亦未能脫時文氣味也然已見訝爲迂遠而厭聽之矣清乃隨時自筆之以備遺忘庚子歲赴會試收置行囊旣而冗中翻目遺之至京檢覓不得意其失之途中矣時方溫菡遂復有錄更三閱